

四庫全書

集部

欽定四庫全書

集部

敬業堂詩集卷十二

詳校官在中允臣璿五珠

助教臣常循覆勘

總校官庶吉士臣倉聖脉

校對官庶吉士臣吳裕德

謄錄監生臣沈希曾

欽定四庫全書

敬業堂詩集卷十一

翰林院編修查慎行撰

芋木集

起己巳十月
盡庚午二月

飲酒得罪古亦有之好事生風旁加指斥其擊而
去之者意雖不在蘇子美而子美亦不免焉禪家
有云芋木隨身逢場作戲聊用自解云爾非以解
客嘲也

送趙秋谷宮坊罷官歸益都四首

時秋谷與余同被吏議

竿木逢場一笑成，酒徒作計太憨生。
荆高市上重相見，搖手休呼舊姓名。

劉魯封章指摘生，滄浪大可濯塵纓。
肯言預會皆名士，誰似君家老叔平。

君別蓬山作謫星，我從霧谷擬潛形。
風波入海知多少，聚散何關兩葉萍。

南北分飛悵各天，輸他先我著歸鞭。
欲逃世網無多語，

莫遣詩名萬口傳

秋谷贈余詩有與君南北馬
牛風一笑同逃世網中之句

初冬拜朱大司空墓感賦

城南舊是陪遊地
一片蒼涼野哭中
宿草墓門黃葉雨
亂鴉祠宇白楊風
餘生削跡誰知己
往事傷心我負公
肯信九原還有路
人間何處不途窮

竹垞招遊白雲觀同錢鷗舫王令貽魏水村嚴
寶仍吳震一分韻二首

沙晴冬候暖古觀晚蒼涼
一徑踏殘葉半庭餘夕陽
泥

封丹竈合石護醮壇方華表依稀似蓬萊是故鄉

得方字

燕丘吾舊到逐伴記新春羽帳千年蛻虛堂四壁塵名

山遊已晚遺跡訪初真欲補儒仙傳欣逢好事人

得春字

重宿傳經書屋與愷功話舊次唐實君留別四

首韻

再來欣接席昨去惜分襟兩度平安字三年聚散心夢
中追舊事愁裏廢孤吟豈意麻茶眼重窺翰墨林

絕域身曾到名駒小最能膽教更事壯詩喜逐年增畏

客門長閉看山閣偶登故知關性分愛近讀書燈

款款留吾住依依見汝情硯冰融墨淡爐火撥灰明淺
夜談難足流年感易成雞頭池上月白髮照初生

易作匆匆別華堂費夢思暗鐘隨杵斷殘燭得花遲穎
待囊錐脫斑從管豹窺出藍真屬望慙媿我稱師

恒齋邀嘗桑落酒同竹垞賦二首

哆口長併壓手杯隔簾鏘器為親開不愁更欠尋常債
每過朱家醉始回

石湖詩句也風流橋露松舫品最優五斗蒲桃真濁味
肯將石室換涼州

同竹垞水村步入一莖菴登妙光閣

偶然聯客袂隨意叩禪關門徑忽新改居僧出未還一
尖城上塔幾點樹頭山此處宜看雪危梯約再攀

善果寺

高林鳴枯風院淨如潑水時有杖藜僧下堦拾槐子

歸義寺

中有遠
初石幢

地作鄰人業苔侵破廟垣兩三碑背字猶記會同年

冬菊聯句二十韻

猶剝籬邊朶幽香伴小齋

魏坤

祇緣開較晚真與俗難諧

行慎憶植當松逕分苗傍秫稽坤一行頭並摘幾稜手親

排慎未治鼉兼龜先防虎似豺坤栽培從老圃束縛向

斜街慎擔喜連泥買僮嗔冒雨差坤素心邀我賞倦眼

為君楷慎白酒重陽過清吟十月偕坤瘦窻圍竹几涼

路別稜鞮慎行獵獵風捎幔紛紛月浸堦坤稍應愁雪妬

幸不被塵埋

慎行

采可芻新釀，簪宜綴冷釵。

坤

葉經霜後

斂花比節前佳

慎行

小塔燈雙影，低屏水一涯。

坤

落隨騷

客賦淡入雅人懷

慎行

寒色方凝榦，新芽已發莖。

坤

過時

拋瓦缶留種記牙牌

慎行

按譜名空羨，餐英願尚乖。

坤

明

年須放早，吾欲返荆柴。

慎行

呂灌園屬題小影二首

不知何處響，淥淥峭削藤蘿側。面峰喚起清風，苔清嘯

濤聲飛上最高松。

曾向山陰作寓公一筇歸借白頭翁
跣跣消得幾多地
何必千岩萬壑中

冬夜朱介垣給諫宅觀倒刺和竹垞凡絕句四
首

樺燭枝枝細吐烟曲屏影裏夜如年
索郎美酒耆婆舞

醉倒蘇家藥玉船

時介垣新
得此杯

雙燕身輕拂地迴歌頭舞遍一回回
問渠從小誰傳得
似按西涼坐部來

鐵撥檀槽急作聲六么輒上一牀箏忽驚雷雨簾前起
殘雪開窻月正晴

薄薄粧梳楚楚伶酒邊孤客對飄零紅筵大有開元曲
別樣傷心已怕聽

大司馬合肥李公見示遊盤山十律兼屬繼和
敬題二章於後

泉石曾關十載心勝遊往往礙朝簔也知去郭無多遠
所喜探幽不在深紫蓋自開蒼蘚路紅紗長護碧山吟

滿空何限松篁韻盡入鸞歌鳳舞音

不教騶唱駭山僧竹杖籃輿取次登老樹傲霜還帶葉
細泉迎暖未成冰盤來磴道雲千疊遠處峯巒雪幾層
已失從遊吾自悔得披高咏興偏增

陸端轂索贈

五色邵平瓜一口韓康價古來高世士亦在長安下軟
塵堆裏記相逢歸夢時時寄短篷筆床茶竈何年具準
擬尋君笠澤東

讀張趾肇徐安序冬日感懷唱和詩次原韻二

首

窻隙飛塵日易斜，忽披新句感尤加。
路難不為登樓賦，才盡非關入夢花。
倚竹何心矜翠袖，聽歌有淚滴紅牙。
斷蓬生事無聊極，不獨君悲我亦嗟。

小榻吟成膝自搖，一燈照影共淪飄。
雪侵短髮雙雙換，寒入深杯九九消。
得氣盆梅偏早綻，向陽籬菊未全凋。
相期並了殘年課，添箇詩筒遣寂寥。

奉送玉峯尚書徐公南歸五十韻

大儒出處逢道貴得正行藏既自斷進退詎關命我公如星
雲一出朝野慶臯夔奮事功燕許媿詔令茲之彌六合鴻業豈易竟
立朝二十年風節嚴且勁高文藉討論大禮資援証以茲契

聖情題扁字輝映交孚由一德心愛非貌敬國家有元
氣培養在交做儲材本報國夾袋記名姓必若入收羅
先須覈言行春秋兩校士冰鑒中外瑩大匠洪陶鈞劍
光出磨錁別裁務去偽崇雅自刪鄭豈不嘆才難得人

際斯盛煌煌起哀手草野議敢橫中流砥狂瀾公論翕
然定官雖謝執法講每直崇政休沐有常期歲時奉朝
請從容大臣體恬退君子性朝來忽拜疏辭切回

天聽

帝曰卿往哉疇為執文柄答云臣力億感激淚交迸告
歸遙俶裝首路春維孟

詔以書局隨還家就叅訂牛腰一百車多與二酉競方
輿廣樂史續鑑改陳桎高館闢翹材名流撤徵聘

謂姜西溟

黃俞卽
諸君 遇榮一時絕典曠千古夔樂天名位似司馬聲

華位鄴侯未足論矧可擬張邴平生釣游處父老喜相
迎太湖洵幽絕天水俱綠淨七十二烟鬟一一落明鏡

公將開書局
於洞庭山

八憲陳鼎彛四壁開畫幃清音絲間竹逸

響鐘答磬鶯花晨赴社魚稻晚報榮暑衫便苧葛臘釀
雜賢聖著書閒有餘卽事樂難罄小子學無成風塵困
趨趨影慙舞袖短顏讓時粧靚饑朔行自嘲寒郊語尤
硬迂疎頗知量鬪捷肯爭徑振翅無雲霄觸藩有機穽

蹉跎曩悔失，鹵莽行恐更。世自傾波濤，吾方溷泥滓。重
來仰翦拂，鬱抱實怵怵。公在士氣伸，公歸士氣病。從公

願于邁，百感發孤咏。

時相約
同出都

送許朔方之雲中

昔我未識子，先與錢生

木菴

友。亟言平生驩，三許不去口。

暘谷詩絕倫，南郊畫無偶。朔方年最少，蘊蓄靡不有。次

第獲論交，前言果匪苟。燕臺昨于役，小許實先後。

甲子
夏與

玉友朔方
同入都

茫茫人海中，相左十八九。移時一把臂，款曲

心互剖吁嗟輕薄兒覆雨數某某勤拳托末契所得良
已厚方知情親疎不係交暫久風塵有歧路南北芥分
手錢生走從軍余去扶病叟重來會合地驚顧各衰醜
慷慨倚和歌淋漓藉杯酒子仍青兩鬢末座獨昂首也
復可憐生雙顴削而黝須臾雙耳熟擊筑間鼓缶疾風
掃河梁挽斷塞門柳前歡今偶續知有後期否故人諸
曹郎出作雲中守子行赴贊畫側翅義奚取行踪等飛
蓬離緒如剪韭長亭七十五山勢西北走并州非故鄉

却立望南斗

題許霜岩畫扇

風前撩亂萬梢柳柳外天斜一扇蓬箇是儂家舊詩景
江湖回首畫圖中

鳴鶴亭詩為關中張鳳舉賦四首

不織筠籠但築亭紅欄日日看梳翎人間只有張公子
合向天河伴翼星

隔窻長聽讀書聲識字多來品倍清

金城衛氏鶴日飼以粥教之三年能

識
宇應笑六郎才思劣羽衣刻木坐吹笙

飲啄依人不自持都緣骨瘦便稱竒雲霄儘有孤飛處
偏愛亭亭獨立時

丈八坡陀尺五天侯門如故客如仙憐他一片氄氄影

曾上羊公舊舞筵

鳳舉為靖
逆侯少子

題沈客子寒郊調馬圖二首

以下庚午
春初作

潑墨揮毫事事能帶腰吟瘦沈吳興如何却向漁陽道

毡帽茸裘學按鷹

小益戎裝悔浪遊不成投筆取封侯殘年射虎非吾分
白石山南去飯牛

西城別墅十三咏新城王清遠屬賦

雲氣朝出岩亭陰滃然接劃分一片影側展屏風疊浦
口有漁榔落帆如斷葉

石帆亭

戢戢犀角雖斑斑鹿皮籜春來頻改路客過行長錯欲
斬又躊躕萬竿殊不惡

徑竹

秦封五大夫兩生獨不肯托根此得地雙榦鬪清迥老

鶴暮歸巢殘陽在高頂

雙松書塢

虎目逃斧斤輪囷誰惜汝薰蕕自然別靈蠢性所予材

與不材間摘兮知自處

大椿軒

九子得其三五老失其二一峯復一峯峯峯不相似雖

非木假山可少老蘇記

三峯

蝴蝶滿南園風輕草初剪林霏入烟霧古洞春猶淺好

去向龍岩築菴名碧蘚

小善卷洞

迴溪轉灣濼滴翠如滴乳岼容兼水色遮斷橋西浦一

卷落床頭春深夜來雨

綠蘿
書屋

不離文字禪半偈亦已多何異百千萬烝沙散恒河蓮

華清漏底晏坐夫云何

半偈
問

蒼濤翻半空清響一聲作頑仙不耐聽下有削頂鶴夜

深忽飛去簌簌衆星落

嘯
臺

鵲山出林郭高處割一拳坐令諸兒孫羅列丈人前對

之能下拜米顛豈非仙

石
丈

草外瑟瑟波波平兩三頃紅鱗尺半魚倒嚼桃花影西

堂夢初覺佳句時一警

春草池

仙犬吠靈根鴉鋤往堪劇曾隨康樂屐竟入麻源谷一

笑却歸來披圖作橫幅

小華子岡

耕犁起同晨牧笛行向晚小庭閒倚杖正值唱歌返杳

杳漸無聲去村知近遠

樵唱軒

將出都門感懷述事上澤州冢宰陳公一百韻

當代中天治千秋一德期大賢多間出鴻業並昭垂夫

子金閨彥名家玉樹枝傅天飛鸞鷲拔水出蛟螭理學

源流沂文章談笑麾巍科仍早掇雅望迥標持館閣迴
翔地風雲獻納資居高懸藻鑑集益藉論思博物時無
亞多聞議必諮六曹兼掌故九列讓委蛇共指文星煥
寧關好爵縻網維張有自津涘挹無涯溯厥流風遠恭
惟樹德滋晉陽丁未季蒞澤徧瘡痍團結因鄉社招搖
視義旗千村同保障一姓獨登陴布置隨方畧分明受
撫綏險憑雙堠設烟合萬家炊寇至呼咸集歸窮戒勿
追宗人全鐵軸鄰叟穩耕犁歲事重憂旱并民又阻飢

九重加軫念百族尚尪羸焚券情相卹嗟來事可唾甫
田憐士女世祿散京坻積貯崇朝盡陰功里老知當官
嗟覆餗扣戶仰由頤及見家餘慶方知善可為潤沾千
里遠力賑一方疲地近瞻恒嶽川長入晉祠午園留獨
樂甲第拓前規好古兼金石搜竒及鼎彝異香黎峒結
秘色汝州磁畫幃多裝軸書囊或借箠筆馳中壘陣墨
洗右軍池弟子河汾盛宮牆魯國推名爭歸夾袋坐愛
傍紗帷手引烟霞上情均雨露施賢良承漢策雅頌叶

周詩至化行如此斯文儼在茲升庸

朝有道羅致野靡遺竊喜逢時泰翻成歎數竒異材胥
奮發蹇足獨顛危詎敢誇華胄聊因述鄙私婺源分末
派海表發南支大理馳封啟中丞畫戟移澤流京兆厚
禍發黨人竒世廟當中葉分宜位鼎司彈章辭激烈伏
闕涕漣沔嚴譴孤蹤逮流官絕域羈左垣言幸中東市
魄終禡門子承堂構文孫接履綦謝宗經鼎盛裴眷有
中哀五葉傳清白全家際亂離兵戈屯井閤榛棘變堂

基春誤尋巢燕秋荒插菊離先人旋遯跡壯志局茅茨
比杜經天寶如陶閱義熙流光傷易邁風木感先萎小
子真無似孤懷忝自惟塤箎偕伯仲弓冶學裘箕蚤被
儒冠誤長遭俗目欺升沈渾莫定矩矱恐長隳蕭瑟囚
山計荒唐捷戶資不成終汎没那得避嶽崎會有從軍
役寧甘伏櫪悲黔山峯轟轟楚水浪差差鉦鼓淵闐發
蕭笳斷續吹征夫攀塞柳野客咏江蘺戎事從人問行
間借馬騎瘴林棲狒猻箐谷竄狐狸耳聽鷓啼血心驚

觀築屍晝紅烽乍舉月黑路偏歌短褐星埃入遐陬露
布馳圖披新聚米局按著殘棋橫草名空挂封侯望本
癡飄然辭幕府逃矣走京師古有矜懷刺時方薄處錐
姓名埋失路出處謝端著徒步親頑僕低顏向細兒幾
逢收駿骨深畏妬蛾眉久抱違時性兼無媚俗姿泥深
蹄躩躩風逆羽禰禰逐伴聽謠曲無聊托酒卮波瀾人
海濶竿木戲場隨照壁寧防蠍吹毛竟得疵任安書未
答朱穆論何疑夢或驚沙蜮歸將友澤麋棄縞知昨失

鑄鐵悔今遲不謂逢韓愈猶煩說項斯感公寬禮數容
我揖堦墀未有阿房賦徒懷北郭絲迂疎疑寸管許與
到單詞峭置千尋壁弘開八達達春陽蒙煦暝霽月睹
光儀款款憐才意依依戀別時爨薪餘撲檄鍛竈仗鑪
錘黻黻雲敷土微茫海測蠡義高攀莫及身賤語終卑
此去鞭重把何年閣再窺鷗波殊浩蕩泛泛問何之

送徐道勇宰順德

萬里驅車路韓蘇蹟尚留往時愁謫宦今日羨吟遊邊

海夏無瘴看山朝有樓感君懸榻意謂我是詩流

時相約同

行奈迫歸計不及赴

酬別許暘谷

男兒有才人見之如眉在額指在掌蘭苔翡翠大海鯨
相去中間幾霄壤天資必從學力到拱把桐椅視培養
方今儕輩盛稱詩萬口雷同和浮響或模漢魏或唐宋
分道揚鑣胡不廣何曾入室溯流源未免窺樊借依傍
我持此論唾者衆同志吳中乃得兩惠生

元龍

格律最謹

欲焚偈仄無端攫世網徒將字句供指摘豈有聲華出
標榜此時披豁喜相從乍挹西山朝氣典論卑引我為
同調烏爪時時發背癢君辭愈降我愈慙文繡飾擬毋
乃枉皇天老眼不到地半世駟馳絆塵鞅三間草屋百
索田願本非奢力難強我今忍饑亦決去麋鹿山林合
長往閉門更讀書十年尚冀成章附吾黨故人倘記臨
別約鬪鴨欄邊好相訪數折溪橋蕩槳迎歌聲正出巔
花港

夜飲槐樹斜街花下
酬別竹垞水村

丁子香邊攔檻小
桃花底杯槃厨燈隔院人靜社雨添
衣夜寒殊方賦別最苦失路還家又難
懊惱鶯啼時節
相思多在春殘

時余將南歸

酬別譚護城都諫

知己無如我少交情
得似君難獨留一榻相待長把深
杯對乾宣武門南舊宅
虎坊橋畔扶欄可惜手栽紅藥

花開又讓人看

虎坊橋東舊寓去秋曾種芍藥八
本余將歸君又遷居故末云然

題壁集

起庚午二月終六月

玉峯大司寇徐公

子告南歸奉

旨仍領書局出都時邀姜西溟及余偕行兩人日有唱
和旗亭堦館汙壁書牆率多口占之作本不足存
存之所以記行跡也

早出彰儀門魏禹平談震方沈客子追送於十
里之外馬上留別二首

金夕四石合言
卷十一
壞壁尋詩又一回殘尊重洗別時杯不因此去添悵
輕跨征鞍自悔來

別期長短路連綿春淺漁陽二月天却檢歷頭同此日

驚心南北忽三年

前年南還去年北發今未裝出
都俱二月二十一日亦一奇也

良鄉次西溟韻

乍來灰洞喜無風馬足殘泥曉漸融料石岡邊春雨晚
廢田無麥草蔥蔥

琉璃河次湯西厓壁間韻

日痕紅曙露初晞
草色迎人欲上衣
頓覺水鄉風景好
一羣野鴨踏波飛

寒食過涿州和西溟

柳色初濃凹字城
胡良河上偏清明
故園三百長亭外
貪得花時一月晴

清明新城道中

縣南風颭酒帘多
澹澹新烟瑟瑟波
一路人家齊上塚
紙錢飛過白溝河

白溝旅店見亡友鄭樊圃舊題愴然有感同西

溟作

一鞭重度瓦橋關
落魄星埃鬢各班
忽見故人題壁在
轉憐爾我是生還

過趙北口晨餐得魚戲和西溟

淼淼波光漾碧虛
中央一帶是民居
綠楊影裏罾竿起
彈鈞人歸食有魚

任丘遇禹司賓尚基歸自閩南以蜜漬荔枝分

餉

易粟寧桃已厭嘗
愛聽風味說南方
費他陸賈千金橐
與致紅綃十八娘

商家林早發

村店荒荒殺漏遲
喚回殘夢眼迷離
曉星一箇明如月
及取朝陽未吐時

冉家橋

楊椿夾岸草抽芽
一綫枯河萬斛沙
記得去年鞭馬渡

滿渠春漲拍桃花

景州次西溟韻

時畿輔
苦旱

自從騎馬出春明
滿眼流移愴客情
此日畿南行向盡
喜逢田婦餉春耕

平原口占戲示西溟二首

碌碌因人事竟成
當初原未識先生處
囊脫穎渾閒事
何苦區區自請行

若將毛遂比夷門
知己何人合感恩
却笑能詩李長吉

信陵不繡繡平原

夜雨

倦枕更闌睡不成
白楊葉戰雨來聲
油燈欲滅尚未滅
睽電隔窓時一明

從十里望抵晏城

春塍雨潤少飛沙
別取林坳一道斜
紅袖倚門桃傍井
又緣迷路得看花

大清橋

風柔自覺輕衫便山近微嫌濕翠多日暮大清橋畔望
一叢春樹擁齊河

崗山

古驛東來路一灣萬枝翠柏護蒼顏不知斤斧逃何幸
大似吾鄉近海山

上巳泰安道中和西溟

平山堂畔忽經年又是荒程上巳天慙愧漿家供野味
樹頭小串摘榆錢

欲登岱不果戲東周通守燕客

潮白三更開島嶼烟青九點散齊州
翰他監稅周簽判
日日肩輿到上頭

羊流店

峴首沈碑事渺茫空傳有淚墮襄陽
居人自重羊公里
未必英雄戀故鄉

新秦城南望蒙山

翠岱孤抽碧玉簪羣山餘勢失
嶰嶰晴雲忽斷東南角

又露東蒙一兩尖

發蒙陰至青馳寺

桑邊棗下歛崎路亂石堆堆數驛亭
野草不知春意好
燒痕三月未全青

渡沂水

白沙沒髀水平腰舟子招人上小船
指似翠華南頓路
舊年此處有浮橋

三月初九日自郟城看桃李至紅花埠二首

枝技能白復能紅
光景年時約畧同
行過曹村貪小住
雙禽對語百花中

油菜花開十里黃
一村蜂蝶鬧斜陽
明知尚隔江淮岸
風物看看近故鄉

官柳

種柳河干比伐檀
黃河今已報安瀾
可憐一路青青色
直到淮南總屬官

大雨早發宿遷

洶洶波聲響濁流疾風吹雨渡潮溝眼前一事差強意
河北人家麥有秋

晚晴入桃源界和西溟

鳴鳩聲裏發孤城行到桃源落照明一色東風占兩候
曉程催雨暮催晴

渡河

沙雨晴來日氣和漲痕連岸落帆多春風吹過桃花信
啼鳩一聲入渡河

淮安上船

厭聽鈴聲愛入舟，只應洗耳向清流。
瓣香夜謁淮神廟，夢穩江南第一州。

過喬石林侍讀縱棹園

一天風雨禁茶蘼，紅葉空欄信尚遲。
只道淮東春已盡，鴨桃猶剩兩三枝。

喬侍讀席上贈歌者六郎

欲顧曾無一字訛，子絃徐引曼聲歌。
青衫憔悴無如我，

酒綠燈紅奈爾何

高郵舟中

蔣牙荻笋碧於天
涸水瀕湖出葑田
鷗鷺較多人較少
斷橋邊有賣魚船

揚州遇杜蒼畧

龍眠

方邵村
侍御

又繼黃岡歿

謂今凡饑
鳳先生

江左風流跡已陳

今日聽君談往事
如逢天寶舊宮人

王羲文閣復申招同西溟泛舟紅橋二首

狂飈高駕海，疊開雪浪千堆倒。捲迴霧氣欲吞吞，不得
紺宮浮出小蓬萊。

月下渡揚子江次西溟韻

妙高峯下曉鐘撞，隔岸吳船正發幫。風露一天人擁被，
櫓枝搖夢過春江。

虎丘後山人家

築岸開池別有津，小橋低映碧鱗鱗。河豚上後魚花賤，
多少山根種水人。

閭門即事

穠花剛被樓遮却又見鄰牆出好枝
一種風光誰管領
金閭門外暮春時

吳江

鱸鄉亭畔麥垂芒水落潮田已半黃
曲折支流通小港
家家門外有船坊

禾中田家

到耳初聞鷓鴣啼平疇小稜趁高低
茅針已老桑芽嫩

金少曰入合言
時節人家正蕩泥

過梅里訪朱西峻

也知陟岵意仍違
纔得還家換袂衣
為報而翁吟望久

白頭京國苦思歸

竹垞先生
尚留燕

題家保三兄小影

分無擁髻對伶玄
赤脚歸仍侍玉川
怪得披圖還一笑
破窻難燭看神仙

題西峻月波吹笛圖二首

苔樣蓑衣綠蓋蓬
輕篙間插月中水
禽兩兩背船去
獨倚賓洲一笛風

一天雲細作魚鱗
千頃頗黎瀉濕銀
解聽鶴南飛曲好
不知誰是倚樓人

柘湖感舊和徐淮江

滿湖輕浪綠差差
別樣風光兩度期
楊柳半帆春載酒
薔薇一硯雨催詩
未知此後花誰主
可惜重來鬢已絲
早是驚心八年事
夢闌燈炮不多時

齊門夜泊

扁舟蕩漾具區東使盡西南一日風到岸檣烟冪冪
隔河簾閣雨濛濛忽來人語蛙聲外亂點燈光水氣中
也識去家今較近酒闌依舊感飄蓬

吳門喜遇田間先生

髮光如葆氣如虹崛起人間八十翁最喜塵埃經歲別
還看筋力舊時同文章有品傳方遠風雨藏山業未終

藏山集先生
未刻詩文也

指與一星人盡識少微今日客吳中

崑山劉改之先生墓和顧伊人

哀壑無人叫杜鵑，馬鞍山麓古墳邊。
東齋路沒荒榛雨。

東齋先生祠
堂也今廢

北郭人犁斷碣烟，湖海尚疑豪氣在。
姓名

翻藉布衣傳，冬青種後諸陵廢。
南渡君臣更可憐。

題沈石田秋江待渡畫卷

晶晶波明嶼舍，苔苔路轉漁灣。
落葉聲中間渡，浮萍影

裏看山。

題陸漢標墨菜圖

小圃朝來露未晞
早菘青脆晚菘肥
老饕不要園官送
直擬從君攫畫歸

武林寓舍少司馬楊公以鮮荔分餉賦謝

絳囊移得洵仙才
珍重瓊漿贈十枚
不向紅塵馳驛到
却從碧海販鮮來
色香尚覺熏肌好
冰雪真隨笑口開
只是野人慙過分
恍疑身自雪峯回

范石湖集四明海
州自福唐來順風

三數日至得荔子色香都未減大勝戎涪間所產
曾有詩云鄞船荔子如新摘行脚何須更雪峯

四殤詩

家貧望多男如農力蓄畬將期秀而實焉得辭勤劬吾
家兄弟間盛事傳鄉閭仲氏艱舉子前年獲駒虞季子
善生兒爛熳引衆雛我兒稍長成次亦舞勺踰豈不顧
恩誼未免督責俱嬌穉尚無知愛憐併屬渠阿巢甫七
齡性慧早讀書近尤喜作字狼藉塗墨豬駟虞頭角好
秀眉清兩矚學語無不能舌本驚老儒阿載方斷乳氣
壓羣兒愚家僮聽指麾步步趨亦趨最小名阿午哇哇
聲已殊今年暮春杪我歸自燕都次第使來前琳琅玉

璠瑒排成一行雁聚若同隊魚公然嫌姆抱見伯同爺
呼漸熟意轉親競前爭挽鬚無何捨之出我又東遊吳
五月到崑山梅雨蒸肌膚去家五十日頗怪一信無濕
螢照昏花雙眼交糝糊羣來入我夢繞膝形蘧蘧明朝
急買舟冒暍返敝廬到門天已黑哭聲滿庭除驚問哭
何為痘殤瘞泉壚一哀吾欲絕老泪沾襟裾自惟世業
荒寶此七丈夫半月奪其四嗚呼彼奚辜季子僅留一
芝焚蘭未枯仲氏一併亡竟失掌上珠矧乃客未返

時德

尹尚在都下

遠隔天北隅，便擬報杏殤。作書寄江湖，又恐傷

汝父臨緘，復躊躇中腸。集百念沈痛，肯斲攄家門百年。
來天闕，代有諸曾王父。早世我祖實少孤，兩叔及先君。
長短歲月，徂短者纔十九，長者五十餘。同祖凡八人，其
三已丘墟。早哀我更甚，所歷多崎嶇。浮生知幾年，煎迫
非一途。傷哉感存歿，天意終何如。

苦雨聯句

風噫作欠伸

顧園河

天愁散咳唾，幕幕繭絲微。

慎行捎捎箭

鏃大排擱挂水簾

河圖

震瓦响雲磨隙景列缺馳

慎行

潛蹤

鬱儀過衣纓黝黷醜

河圖

扉履濺泥污蝸吮引長涎

慎行

鼯

怒鼓羣和噉按聚蠅饕

河圖

痒肌飽蚤餓嘔噦減食單

慎行

撲緣廢書課帖席惡膠粘

河圖

歷階防跌蹉遙岑餐如遁

慎行高浪騰誰簸方當戒舟航

河圖

矧迺疲鞍馱溝圳潭齊

慎行腰田塍淖沒髀落衣妥兩肩

河圖

烟殼背一筓栖畝占

來牟慎行分秧滯杭稔青葱卓針立

河圖

黃萎垂芒卧造物

有暴殄慎行農功豈媮媮乾土盡翻沈

河圖

漏天難補破餘

飛遠乍散慎晚色晴微作暑濕旋復蒸河壯陰那肯挫

走章牋碧翁

慎

行苦雨毋受賀

河

敬業堂詩集卷十一

欽定四庫全書

敬業堂詩集卷十二

翰林院編修查慎行撰

橘社集

起庚午秋
終十二月

橘社在洞庭東山之麓劉氏取以名園秋冬間假館於此與書局諸同人唱酬不少嚶城張漢瞻為鏤刻于吳中者非足本也

將赴洞庭書局雨中與徐淮江別二首

一領西風季子裘
亂砧聲裏又殘秋
人間尚有君憐我
每過南湖作少留

小港平橋宛轉通
船頭一片採菱風
孤燈十載江湖雨
腸斷瀟瀟此夜中

曉發昏口

半浮半沒樹頭樹
乍合乍離山外山
借取日光磨一鏡
吳娘船上看烟鬟

渡太湖晚至東山

秋水如膏滑上船峭帆衝破五湖烟豈知地少雲多處
別有橙黃橘綠天枕簟欲清他夜夢杖藜行結好山緣
詩人愛入雞豚社

橫烟裊處雞豚社范
石湖遊東山詩中句

只欠躬耕十畝

田

山居詩次大司寇徐公原韻三首

得從林屋賦閒居勝駕還朝四望車萬頃波濤憑檻外
一天風雨落帆初龍威寂莫重搜字笠澤叢殘舊著書
便與伊川同擊壤何妨問答到樵漁

公歸海內重儒宗不數瑯琊邴曼容
霜晚黃分湖岸稻烟朝翠掃寺門
松晴來片片雲盤鶴雨過條條礮
飲龍見說莫矍峰絕頂時陪五老握青筇

落托生涯最善愁暫來我亦欲忘憂
淋漓命酒長連夕次第看花已過秋
四壁書多仍萬卷五湖人少但扁舟
西山勝槩差能說興到還期爛熳遊

張漢瞻有喜余至山中之什次原韻奉答

啣尾船開古渡頭擣聲導我向中流
似曾有約來同日

不比無聊賦獨遊坐擁畫屏長對榻

時同寓
啟雲樓

行逢精舍

必登樓因君撥觸聯吟興豈可湖山少唱酬

同徐敬可吳西齋張漢瞻遊翠峰寺和漢瞻韻

陰雲解駁日光穿行盡松門始見天
旂影自飄空翠外
樵歌時出斷碑前
經樓晝靜孤鐘發
井石痕深萬縷牽
我欲問龍還乞水
與君洗眼對殘編

寺後有龍井為
雪竇禪師故蹟

遠翠閣和漢瞻韻

處士留陳迹

閣為陳眉
公所建

軒窓背嶺開
練光鋪几席
烟氣

濕亭臺林僻僧宜少天晴鶴未迴共拚吟遣日無事定
重來

微香閣次敬可韻

蘚徑碧侵遊子屐楓林紅上羽人衣一聲清磬落何處
坐看香烟成翠微

二峯和漢瞻韻

儼與莫釐並所爭惟一峯未應甘出袴且喜得隨肩潮
湧東隅日雲垂北面天短筇如健僕扶上最高巔

登莫釐峰二首和漢瞻

青天七十二芙蓉個是芙蓉第一峰
吳越有山多作案東南無水不朝宗
盪空日氣消飛蜃拔地風聲穩卧龍
曾記岳陽樓畔望肯教雲夢芥吾胸

百層風磴盤旋上大似鞦韆乍解條
放眼不知何處盡置身直覺此峰高
沈沈海浦黃雲岸點點吳帆白鷺濤
未免傍人嗤好事重陽已過興仍豪

時重九後四日

敞雲樓次顧文景范韻

堵牆高下列丹楓平視茫茫但碧空地迥最宜千尺上
景竒獨占一山東湖光夜閃疑飛電磴道秋垂似偃虹
多愧元龍豪氣在每聞清嘯發樓中

姜西溟繼赴北闈今仍下第作詩招之

散是飛蓬聚是萍可憐南北總飄零一名於爾何輕重
雙眼從人自醉醒沙路離離鴉接翅霜天矯矯雁開翎
此愁除有詩能豁亟買歸舫下洞庭

題劉氏東樓

連山正缺西南角，合有高樓面太湖。不許遊人誇目力，
淡雲濃日兩模糊。

出雲篇和西齋

山以東得名羅列，非一嶺兒孫丈人行。屈首殊未肯，今
晨天忽雲晴色。變滄洞蒸蒸氣，浮盞冒烟上井衆峰。
處囊中刻露錐出穎，一峯獨埋沒有物踞其頂。陽烏從
東升對射，却無影。林寒不受照，萬象淒以冷。大風西北
來作力，一何猛。奔逃脫鱗甲，破碎寧復整。正賴湖腹寬。

吐吞在俄頃山人耳目炫夢嚙喚初醒重看莫釐高乃
若裘挈領

送田間先生歸桐城兼寄高丹植明府

滿篋詩文手自編秋風攜上皖江船氣吞湖海豪猶昔

老閱滄桑骨已仙愁裏豈堪論往事

先生詩集中有與先君子長干酬答

詩部中容易著高賢馳書早報樅陽令薄少時應致俸

錢

菊

隨分沿溪細作行
開時何必定重陽
畦丁自愛無他種
橘柚連山一例黃

山樓曉起

枕上秋風疑有雨
覺來已是日高時
拓窓簌簌墮黃葉
蒼鼠驚人竄別枝

晚窓即目

變態多從咫尺看
只爭濃淡淺深間
斜陽已落月未上
烟外數峯如遠山

木芙蓉索漢瞻和

烏柏微丹鴨脚黃
爭將病葉領秋光
後時猶作好顏色
笑爾一枝紅拒霜

自題放鴨圖小影後四首

偶煩妙手寫吳綾
未必扁舟興便乘
一笑披圖還作識
此來真箇住松陵

淺水蘆根啞啞聞
背蓬公尾雪紛紛
湖中別有東西鴨

飛向遙天莫亂羣

東鴨西鴨太湖中二山名

竒絕佳名屬兩山新詩多著畫圖間放船不怕人爭路

自占儂家第一灣

東洞庭有查灣西洞庭有查山見震澤編

不用低欄照水紅一竿活計趁樵風江湖老伴憐渠在

踏浪長隨巾角翁

東坡詩我哀寄江湖老伴雜鷺鴨孟郊詩何如巾角翁至死不裹頭

食橘二首

樹樹垂垂顆顆勻山家生計不愁貧若教朱實仍包貢

那得分甘到野人

洞庭貢橘唐宋時有之至明始罷懼佑宗吉詩有玉食無緣進上方之句

小園一百二十樹摧壞年來成橘薪每到霜前悲手澤

可堪客裏又嘗新

西園橘栽先人手植也已
已冬寒悉皆凍斃故及之

漢瞻自洞庭先歸詩以志別即次見贈舊韻

兼旬索句添窮忙草根唧唧蟲鳴霜尚慙皮陸作唱和
敢與李杜爭光芒君詩盡納三萬派山骨巉巖波洋洋
登壇欲來執牛耳取徑故險迴羊腸林深霧黯蓄幽氣
虹見雨霽開晴光吟從舌端作倔强寫向紙面生低昂
稍嫌工遲似司馬容我笑傲林泉旁憶初弭棹同卧起
明朝聯臂登高岡穿松踏石困俛仰攀躋中道多徊徨

奇峰忽拔二千尺快劍磨出蓮花銛聳身側足狂叫絕
生平奇境得未嘗三湘七澤舊雖到却溯洲渚寡孤芳
黃金荒臺感燕士畫棟高閣悲滕王十年浪走癡已極
游蹤脫畧失故鄉星埃大笑一回首攝衣纔謁三高堂
所嗟筋力就疲憊漸遣興趣成頽唐眼前又當搖落候
蒹葭露白秋蒼蒼不知此中有何樂對爾意氣還飛揚
男兒生涯志未豁善刀合學庖丁藏百觚醉汲鄰叟甕
一枕倦寄高僧房得道在先成佛後茲理反覆天應償

逢人但拜孟東野去我獨惜張文昌扶筇縹緲有夙約

與漢瞻約游
西山未果

肯計盍底無餘糧風波衝冒總為此子今

東書我亦將行當長謠答黃竹不爾妙曲賡紅桑鬱鬱

誰能耐離索空樓夜雨思連床年來萬事經眼見窮達

竟分姜與湯

不分窮約姜與湯漢瞻
舊句也謂西溟西厓

舊遊如夢那可說

祇有末路堪評量名山業豈異人事慎勿屑屑耽詞章

夜坐有懷張漢瞻吳西齋

二子相
繼別去

山谷天早寒經檐白日速夜長耿無寐愛此一寸燭展

卷乍沈吟開軒屢躑躅我唱和者誰淒其感幽獨別時
秋林下錦纈黃映綠幾日不上樓敗葉忽已禿悲風颭
然起槭槭響枯木靜覺流光移暗傷懷抱觸小僮強解
事鄰釀貫新熟酒罷還夢君湖心浪如屋

重登莫釐峯望吳興諸山

吳會諸峯繞作環荆溪百瀆瀉成灣西南遠景新收得
一髮螺青是弁山

從渡水橋步行至武山小憩吳氏園亭十四韻

過橋繞半里空澗得平原野艇苓箸渡斜陽攏棹村晚

來魚論斗

吳志云吳俗以斗論魚二斤半為一斗

僻處犬依樊歲稔松醪

賤秋辭社鼓喧草根驚雉起

洞庭志東山有雉而無兔西山有兔而無雉

木

未見鷗翻面面帆移岼家家水到門泉清能止渴山淺

易尋源又接攀躋路重窺種植園罽衣橙刺密耀眼橘

頭繁舊蕪荷傾沼新泥菊上盆苔滋行每滑石好坐能

溫隔竹傳壺箭隨花倚畫軒何須問生理即此是仙源

遠色蒼然合歸途月有痕

欲往豐圻看楓葉為雨阻

山中築居如築城，往往人家背山住。連街接巷比通關，
雖有林巒無曠趣。敞雲樓東鴨脚木，亂葉成堆稍通路。
此中合着杜門人，一月出遊凡幾度。我生夙嗜久撿棄，
祇有吟情剩如故。頗聞人說豐圻勝，況有丹楓照秋暮。
魚蝦市遠風不腥，橘柚園深香作霧。朝來折柬約溪友，
預飭晨炊治遊具。佳山復作遊山人，此事寧防天亦妬。
初看靄黴雲似墨，忽聽淋漓浪雨如。注客言萬事難逆料，

投足無端動關數豈知勇怯總由人老嫻逡巡坐自誤
憶當涉世氣鹵莽浪走風塵飽霜露衝泥驢背不自惜
到此翻令限跬步天工作意不肯晴明日披蓑杖藜去

大雨同胡拙明閣百詩登湖樓

大聲拔湖洪飛上巨鯨背歛空作猛雨側射怒百倍萬
木助一喧掀騰走羣怪樓孤若搖動勢已岌岌殆雲頭
排窻來山影忽在外目存思欲絕境變奇乃最我詩苦
難工傑句應有待

順風渡湖瞬息抵胥口

匹練掣柁痕虛弓曠帆勢不知小榜迅但見青山逝孤
塔表靈嵒卓針辨湖澁須臾忽到岸轟轟在天際

虎丘晚泊

山淺橋平水一隈幾株紅樹寺門開從看小景如盆盎
新向湖天放眼回

拔白詩

并序

昔蘇子由有白髮近二十年虔州道人王正彥教令

拔去以真水火養之從其言數月而白髮不出因作
詩自言拔白之驗余今年忽有白髭二莖攬鏡鑷去
且三月矣竟不復生喜事有偶合者因用其意作詩
一章然養生家言僕固不解也

人生正庭樹官骸乃皮膚樹有花與葉人有髮與鬚花
葉本斃榮鬚髮那不枯我今過四十貌作山澤臞憂患
煎心神奔馳瘁形軀早衰理則爾何用長吁嗟雙鬢久
星星見慣習與俱白髭忽新變刺眼生躊躇我欲捫使

斷苦吟徒自愚我欲媚後生染之非丈夫不如竟拔去
誰能忍斯須初若蠹蝕葉幾片離根枝又若耘除稂良
苗漸蘇蘇爾來九十日萌蘖喜絕無養生素乏術寸田
任榛蕪何當刷黃精白髮併掃除

朱雪鴻移居詩和梨洲先生

蘧廬天地總羈縲瓜跡何煩苦印泥招隱莫分山大小
卜居難定灑東西一舟最穩裝書重四壁初安待客題
終勝梁鴻依廡下年年并白累山妻

雪夜發玉峯數日前沈昭嗣呂山瀏顧書宣先
往洞庭作詩寄之

落木灣頭雪灑燈卧聞漁子尚牽罾寒光潑被夜如月
野水割船冬始冰風逆不知何日到山高宜及此時登
湖天霽色詩兼畫待我舟中酒二升

從橫塘晚至木瀆舟中寒甚

西北風狂野氣昏船窓擁火取微溫殘陽正墮塔邊寺
薄雪未消湖外村木盡脫時喧鳥雀稻成堆處散雞豚

可憐歲晚不歸客對景躊躇思故園

雪後曉渡太湖

黃蘆吹斷黑頭風寒日初生血樣紅一片湖山新著色
萬螺浮白碧壺中

次韻答趙蒙泉閩中見懷之作

得喪年來已貫經忽披佳句又心驚計疎更事多成悔
身賤依人自覺輕壺口欲從敲後缺劔鐔猶發扣時鳴

來詩有先生豈
以不平鳴句

短檠牆角差難棄賴是看書眼尚明

王令詒自閩歸出示途中見寄二章次韻奉答

船頭船尾榕陰綠城北城南荔子紅懊惱此中多賦別

勝遊從古幾人同

右荅南浦見寄

自攜驢券出都城草草裝隨短策橫失路歸添遊子淚
加餐書荷遠人情愁隨越鳥方南向懶赴邊鴻又北征

不用苦教詩激楚漫天風雨正秋聲

右荅晚泊見寄

送山瀏自洞庭歸塘西兼寄張介山陸厚容金

子由諸子

無多唱和留君集來往真如相避然一葉驚回三載夢
兩萍漂散五湖天新書著罷從人笑善病同時得婦憐
山澗聞嫂夫人抱疴已亦致疾好向橋西呼酒伴放狂作達過殘年

雲石菴和書宣韻

一徑入雙塢

菴在大塢小塢兩山間

遙從澗道求泉枯行汲遠竹

密得窻幽日氣通亭午濤聲捲上頭踞高真得勢矮屋
也如樓

白龍泉和沈昭嗣韻

半嶺通湖眼閒僧護井湄自能清徹底何用砌成池
鳥道尋難到龍湫怒或移不知風雨候可有氣如絲

來鶴樓和韻

樓址為某姓墓地

舊日松楸廢何年笙鶴來
樵人憐葬域山鬼避香臺
峰勢重重合湖光灑灑開
步虛人罕到猜是小蓬萊

題書宣小影

十萬青鸞尾搖竹映得詩人鬢
毛綠此中可少三間屋
竹西三月桃花紅前村後村烟
濛濛此中可少一扇蓬

遠勢兼收隔江塔

指圖山也

與君作詩論畫法借君門前來

放鴨

書宣以藥酒一甕見餉賦謝

北風夜半收鳴颺冷光浸日湖不波對門老樹盡僵立
枝顛斗大鵲作窠山人畏寒卧復起排籤十指無人呵

雲間陳翁

山農

好事者乞與方法招詩魔酒材難致藥料

貴正苦羞澁囊無他感君餉我分一器何異良劑投沈
疴甕城新開香繞鼻瀉以碧椀承紅螺甘分沆瀣光琥

珀村釀不數黃如鷺夕時小酌午未醒挾纈續乍回陽
和蓬蓬入腦聲自覺粥粥浮面顏微醺枯腸一洗枵藁
出老眼亂瞥昏花過肩高尚吟薄薄酒耳熱漫作烏烏
歌井湄效箴笑揚子春色可賦煩東坡犀首達生坐無
事袁絲遣日知亡何有生得此亦過分況敢嗜好窮搜
羅偶將一醉累良友亟饋莫必患已多預愁餅罄唇吻
燥挹漿那得翻天河

書宣次韻見答復倒用前韻作一章邀余繼和

時書宣將歸揚州兼以贈別

君才如漢江淮河駕天輸浪豈患多坐批百家目炯炯
行貯四庫胸羅羅詞源獨騁曹植富餘地不量繼者何
金丸脫手最輕捷快馬直下胭脂坡朝來赫蹏急傳示
白雪竟壓巴人歌我時解鞍息蹇足卧看縱轡奔騰過
吟情欲探酒力發小戶一盞熏顏酡平生有作每倔強
音調太急絃難和醉來反嫌天地窄局促未免愁籠鷺
團團陳跡走循磨眩眩纈眼光旋螺爾來檢點稍知悔

思以勺水湔前疴可憐故態時復作形雖近放心靡他
人生有情會有癖湛詩麩藥俱成魔何如牢守昔賢戒
不吟不醉從嘲呵逝將嗇養全晚計野蠶簇繭蜂藏窠
子今勇決乃過我氣盛不怕江翻波臨行舉杯懺口業
拔劍倘斫生蛟鼉

以藥酒分餉唐實君吳西齋再疊倒韻索和

鷓夷皤腹鼠飲河就中滿貯得幾多玻璃萬頃吸不盡
霜風吹淺如碧羅詩人氣麓言語大鐫琢造化將誰何

婁東二生我同調得第厭上金鑾坡竭來忘分更莫逆
銅斗許和寒郊歌湖心淺山住隔巷衝凍踏月頻經過
所慙才分非爾敵頰面未飲長先酤愁腸酒肺互撐拄
正賴藥味相調和長瓶分餉良有以願奢似挾山陰鷺
鷗鷁聊足注半杓鸚鵡恰好浮雙螺便從唐侯促佳句
賓君許題放鴨圖詩尚未至更祝吳子蠲微疴時西齋屬微疾號呶當筵誰
是主剥啄扣戶人非他林髓木客盡逃避氣豪橫欲駈
羣魔此間差無俗物擾尚有亭長能相呵懷哉歲暮盍

歸去坐看日夕雞棲窠小槽溜溜聽壓蔗饒涎亂湧珠
跳波床頭一壺堪醉倒不知門外傳更鼉

題鄒毅仁書劍圖

學書差足記姓名學劍無過一人敵英雄竟以成敗論
二語千年共指摘我持此論君勿疑潦倒粗言身所歷
方當出遊氣盛壯逸足誰堪受羈勒有文曾詡弔戰場
有力能誇控鳴鏑蹉跎祖述難着鞭爛熳陳琳徒草檄
収身十載赴場屋往往雄風避雌霓眼看騏驎盡先登

駑鈍悲嘶仍皂櫪天涯行旅慣黑瘦世上男兒多白晷
讀書擊劍兩無成鄧禹笑人終寂寂子才去我固十倍
射扎穿揚準懸的胡為垂翅亦襜褕予美誰侮邛有鷗
三年奏牘困方朔五十吟詩笑高適馬應換妾刀贈人
龜手如何學緝緝薄田可耕池可釣良耜畧畧竿籊籊
還君此畫一展然寒盡知年不須歷

梁溪馬碧滄索題桐山草堂

吟徧峯頭又水涯九龍歸夢隔烟霞期君早種十年樹

待我來看三月華藥錄欲傳須手著琴材若中有人誇
不然斗大成何用萬里丹山客是家

訪云梧桐大如
斗主人出外走

題鄒舜五采蓴圖卷子次陳眉公舊韻

斂舷聲動吳歌起沙戶生涯雜魚米此中有蓴誰識之
埋沒蒼烟白蘋裏湖波太淡無鹽豉葉自青青莖自紫
脆如雪藕滑春冰異產寧教屨紈綺紅鱸四腮差可配
二老朝來動食指弄潮踏浪去何憂占斷湖心一片秋
百年好事留詩畫從此流傳到武丘人間網利多堪慮

橈雞聲外輕寒酒力中殘年歸夢潤惆悵兩心同

雪後至閶門換船

北風吹樓臺白日雪打面閶門十萬戶咫尺不可辨歸
舟一葉輕欲與嚴寒戰所欣吳中稔酒價冬來賤我裘
雖云敝一醉煖堪戀尚有無褐人忍饑冒霜霰

吳門橋阻凍

白日淡無色北風吹作陰浪增冰力厚橋插凍痕深已
近故鄉路偏傷獨客心

是日蒙泉
歸琴城

鄰船如比屋兒女盡

吳音

入胥門訪薛孝穆不值留詩示之兼簡許暘谷

錢玉友

風止澤腹堅篙輕不可鑿短篷壓頭卧竟作三日惡賈
客聚連檣荒灣比村落人羣自歡笑而我無處著遂訪
薛逢居衝風入南郭初來殊奮迅欲去轉寂莫窮途所
向昧妄冀朋友樂錢許初北歸合并有成約十日前玉
友暘谷自

燕中返虞山期於吳門參辰在咫尺矧乃道里各天寒
相晤亦為冰雪所阻

歲偪臘何以慰離索興盡返孤舟獨吟還獨酌

打冰詞

寒光射川如浴鐵千艘萬艘陷頑石鑿山通道古有之
河伯憑堅蟻難穴官船自倚人力強冰推亂擊船兩傍
船頭乍開船尾結去岸却泊河中央篙師笑謂官勿爾
世路升沈總如此若將人力與天爭倒捲天河應瀉水
阻冰七日始得發舟


筮易玩其占七日當解凍朝來覘風色東面柳初弄天

行既來復人力漸可用南船鑿冰來銀浦作流承小僮
報竒事水活鱗甲動老夫亦欣然私喜言幸中披衣促
解纜一笑破愁夢稍稍啣尾行線路爭一縫虎齒截兩
涯倚棹誰敢縱遲遲計尺寸去去逐儕衆到家庶有期
春麥尚及種茆檐曝初旭宿火煨老葑旅食饕風霜何
如抱飯甕作詩當箴銘悔往聊自諷

夜泊平望驛橋下

捩柁開吳江收帆宿平望環橋橫吾前天勢墮空曠或

言虹下飲比擬猶未當分明半輪月初吐碧波上風定
川不波上下巧相況小舟入圓鏡光景互摩盪夜寒人
語稀獨此發孤唱



敬業堂詩集卷十二

欽定四庫全書

集部

敬業堂詩集卷十三

詳校官左中允臣塘五珠

助教臣常循覆勛

總校官燕吉士臣倉聖脉

校對官庶吉士臣吳裕德

騰錄監生臣徐瑶

欽定四庫全書

敬業堂詩集卷十三

翰林院編修查慎行撰

勸酬集

盡辛未
一年

已未以後衣食奔走與德尹出入如相避庚午偁
臘歸自具區德尹適從洛中旋里除夕酌酒相勞
益十二年無此樂矣爰相約為杜門計盡辛未一
年凡得詩如干首

元夕同顧伊人張崑詒集徐敬思宅分得燈字
自到君家飲量增也教小戶罄三升笙歌院隔新翻曲
書畫屏開巧樣燈知有清光終讓月可無佳句冷如水

誇張節物誠多事誰似詩人范致能

范石湖有上元紀
吳下節物三十二

韻

崑山一名玉峰周圍二里許似累石而成者唐
張祐孟郊有詩與蓋嶼所畫山圖同留慧聚寺
中向有石刻宋皇祐中王半山以舒州倅至縣

相水利登山閱二公詩次韻和之時稱四絕淳

熙中寺燬於火自唐以來名流題咏及楊惠之

所塑毗沙門天王像

或云張爰
兒所作

李後主所書榜

額一掃無餘今準提閣壁間石刻三公詩乃後
人補刻非故物也正月十六日同張昆詒盧素
公登山感懷往蹟為詳考本末并系以詩

吳中園圃愛假山家家畫藁撫荆闢此山本真翻似假
怪石疊起孤城間奇峰尤在西南頰縹緲玲瓏還戍削

遊人仰視一綫天，信有孤雲生兩角。幾輩留題盛昔賢，
曾聞摹勒載名篇。崑岡烈火精藍盡，何物能為金石堅。
人間假合夫何有，差是令名堪不朽。我詩寫意直取真，
嗤點還須防衆口。

德尹四十初度二首同潤木作

四十平頭齒未頽，誰教辛苦逐風埃。祝君此日無多語，

正要飛騰暮景來。

少陵詩四十明朝
過飛騰暮景斜

蒲柳桑榆各老成，一杯相屬話生平。十年多少回頭事，

我是蕪家白髮兄

用東坡壽子
由詩中語

題又微姪投壺圖小照

五經一笥笑老韶長養侍兒如許嬌
卷衣風裏聽傳箭
近前爭賭蓮花驍

初夏園居十二絕句

人言瘦地差宜竹隣舍曾分一本栽
尺八梢溝攔不斷
狂鞭攬過菜畦來

牡丹不稱種村莊開到春殘盡
野芳旃棘補籬成片段

丁香香過木香香

亭臺廢後變溝塍欲置茅齋力未能大抵為園多借景

別家高樹挂朱藤

方池一畝萍初合四月中旬未有蛙簇簇銀針齊上水

綠楊影動散魚花

莎軟鋪茵纔沒膝樹圓擁繖正遮頭如花流過碧池去

忽聽一聲黃栗留

詩疏黃鳥黃鸝留也或謂之黃栗留

長年因病醫方熟小草隨時藥料增趁取連朝好風日

帶花收晒鷺絲藤

閏年留竹苦防蠹辰日種瓜須早澆
愛花更作晚秋計
老瓦盆邊分菊苗

鷲粟著子米囊小蠶豆褪花皂莢成
莫欺老圃不工畫
小碎詩篇如寫生

去秋梧子收不盡旋向根邊兩葉生
保得主人長閉戶
四三年便看陰成

自蟠老榦自抽條長養仙家枸杞苗
不似苔華難獨立

附他喬木號凌霄

鳴聲上下羽交交雀穀初安樹一梢啼殺斑鳩生計拙
將雛時節定爭巢

頭眠已過二眠新蠶候叅差雜四隣一月往來渾斷絕
隔籬時見采桑人

橘薪

生意千頭盡園租五畝荒子孫貧敢計奴婢價誰償入
室鉤衣破為薪刺眼傷更愁秋冷澹屋角少青黃

新竹

插槿三年與作樊，又添客土護深根。主人愛竹老成癖，

看笋出林如子孫。

二月得長孫名
與祖故及之

布幔和德尹二首

細竹輕竿稍出檐，空庭得蔭比松杉。賽他畫舫齋中卧，

平展江心一面帆。

背日開簾更覺涼，午陰屋角漏微光。呼兒勤掃蜘蛛網，

方便花時蝶過墻。

梅雨連旬河流暴漲偶同德尹泛村船入菖蒲

港

雨急溝渠漲怒生再添一尺與橋平無端驚起江湖夢
聽作船頭放櫓聲

雨後

便從一雨望豐年大抵人情慰目前我比老農還計短
只貪今夜夜涼眠

衰至

中年事事防衰至不獨侵尋感歲華
誤去黑鬚因鑷白
旋揩昏眼又生花
顏唐老境詩無格
汗漫遊踪累有家
合是歸時歸亦得
趁收麥豆種胡麻

庭前草花與德尹分韻四首

輕刀勻剪翠葱蘢
別圃移來土最鬆
累爾纏綿附枯竹
屋低庭小不栽松

女蘿

小兒稱長老稱翁
比似花冠約略同
消得閒人閒處看

可憐小草亦爭雄

雞冠

羣羣紅白隔窻紗么鳳飛來冒鬢鴉老眼自看還自笑

種花猶種女兒花

鳳仙

位置瓷盆手自親暑風香透色如銀
暫歸我已家如客

還與南花作主人

茉莉張叔敏呼為遠客范石湖詩南花宜夏不禁涼

夢中得絕句似小遊仙詩醒而錄之

東海東頭拾火珠抱來徑寸豈論銖
兒童莫逐黃金彈
笑向扶桑打赤烏

舟曉次德尹韻二首

螢尾孤光合復開
灣頭風急却飛回
菰蒲深處一枝櫓
搖入漁人夢裏來

狂蛙鬧雨羣千百
遠火疑星點兩三
忽聽雞鳴鐘渡水
有人家處有茅菴

次韻答陸柱瀾見訪

旅塵狂走十年餘
每到還家歎瑟居
髮變一頭俄向老
草荒三徑只如初
傷心短蘧經時淚

外舅射山先生已下世

覆手

貧交屈指踈多謝
新詩猶念舊可能
懷抱對君杼

程西村以如圃詩索和次原韻

人境何曾礙結廬一椽樸茂似園居
耨荒自作披榛賦
得法新傳種樹書
老圃閒談真可聽
比隣初約莫教虛
笑他亭館多何益
無福能消鼠壤蔬

七夕同德尹潤木作禁用故實

眼中七度如梳月
又帶桐陰入小樓
懊惱一天星似火
閏年今夕未交秋

茨菰見唐人詩如白香山云渠荒新葉長
慈姑

朱放云茨菰葉爛別西灣劉夢得云菰葉風開
綠剪刀未有及其花者余盆池偶種一窠立秋
後忽發細莖每節叢生花開純白色如玉蝶梅
差小頗有清香因作一首以補詩家之缺

舊葉復新葉碧莖忽抽芽誰將綠剪刀剪出白玉花水
邊有秋意涼蝶來西家

惠研谿庶常從京師寄到吳超士見懷詩四章
次韻奉酬並簡研谿

故人隔座呼同舍
花底移樽醉小樓

余初識超士於研谿館舍

散作

兩萍漂水面遠煩尺鯉到沙頭
狂名自悔逃難穩歸志

差堅挽不留一窖黃塵殘夢外
為君牽動十年愁

飄瓦虛舟豈有因誰當入爨
惜勞薪潛形那避含沙射

沈璧何來按劍嗔

來詩言及已巳秋飲酒得罪事故云

桂樹叢荒招隱伴

楊花風墮倦遊人
白衣蒼狗須臾事醉眼看來分外新

黃羊枰上守枯碁
訝許人間獨亢眉
一戒早開元亮酒

半年遲答暢當詩
迴腸徑路梯空險
徹骨冰霜造物慈

羸對村童開口笑竿頭新作釣漁師

卧聽門前剥啄聲書來猶勸束裝行貧逢閏歲增薪米
病過新秋減送迎涼雨半窓初到竹碧尊千里正宜羹
也應世味多忘却除是難忘故舊情

種菊詩示克建克承兩兒時余將往湓城

擾擾十三載孤蹤混泥沙及歸翻苦閒何以銷年華種
菊亦偶爾惜此徑寸芽春苗不分栽秋至焉得花

惡草既親鋤清泉亦手灌却將四體勤覬博兩目翫舍

之忽將去笑別東籬伴根是老人培花從汝曹看

夜初涼

人靜覺夜涼書帷傍清樾不忍陷秋蟲吹燈還就月

湓城之遊未果作詩示德尹兼答朱恒齋太守

貧賤胡可居無端兩憔悴侵尋歎末路鹵莽悔初志豈
無骨肉恩聚少別苦易分馳十年外廬舍任榛刺殘冬
偶同歸草草如旅次杜門得半載村巷傳異事不知相
見驩中有思親淚兩櫃猶在堂牛眠指何地堪輿及日

相時俗多拘忌吾寧葬吾親忍規子孫計所嗟難物力
動輒故人累潯陽賢使君清俸煩遠致有生迫孤露久
矣衆所棄誰能念窮交尚舉麥舟義當之恐過分一感
再三媿佳招况踰期

恒齋來札約余
季夏至湓城

欲往未得遂我貧

荷見諒應并諒此意鴻鴈滿江湖詩成特先寄

題馬漁村行路難小影

狂瀾打頭山壓面跼蹐乾坤縈一綫我行畏路知路難
談虎還防君色變君家門前池水清對門山與樓簷平

此中徑路坦於掌作底胸次添崢嶸畫師寫圖如有託
洗耳聽琴差不惡可憐冰雪七條絃千萬勿彈螿捕蟬

送楊次也入都並簡尊甫太史公三首

八座重親未白頭角巾里第最風流孫枝本是階庭秀
鞦韆看他又出遊

石渠天祿近何如欲讀應無未見書

用黃香傳中語

但約南船

多載酒對難官燭看銀魚

時嵩木嫂夫人亦北上故及之

交情到爾凡三世得路憐余共一心重向別中留望眼

別愁終淺望終深

竹溪書屋為又微聲山兩姪賦三首

竹栢陰交槐柳陰
踈籬一帶棘除針
自從新改橋邊路
大費花時曲折尋

記得當時牛角遊
書聲愛聽出林丘
兩家前輩多凋謝

又對兒孫感白頭

石丈兄與先君子情好最密每過裕菴余兄弟未嘗不隨行也

夕火晨香共一龕
閒隨清磬出花南
居人盡識藏書處

碧蘚蒼藤白石菴

用李公擇事

沈稼村太史招飲耿巖草堂

十里秋光雨洗新
稻花香路淨無塵
門依曲沼難通櫂
居近東家愛得隣
却對杯棹寬禮數
每聽談論長精神
回看宦海波濤濶
轉羨收帆到岸人

墟墟舟中口占同德尹作二首

水面浮漚的的圓
采菱歌出采蓮船
此歌賴是吳兒唱
若是吳孃更可憐

樹低草沒一叢叢
曉日橫生白蕩風
拍岸水痕高一尺

布帆抄路稻田中

膠城孫愷似編修欲行善於其鄉竟遭吏議今
方罷官就訊吳中相遇感憤成詩

蒼狗如雲極可哀危機翻自

詔恩來家承忠孝身尤重禍起衣冠勢易推善不可為
寧論惡人皆欲殺我憐才乾坤直似蝸廬窄懷抱除非
醉始開

胥門曉發

月落日未升大星明一箇舟人貪早起客子便晨卧忽
聞水氣腥知有漁榔過

長水塘夜泊

高埭接長橋橋形落蠓螭市喧夜微息犬吠船猶動可
憐一川月細碎如潑豕忍負好秋光推蓬兀殘夢

庭桂初開隣人有來乞花者

吳閭十日遊歸權及秋仲入門視庭桂破蕾暗香動常
時花最早七夕露華重苦怪今年遲曾經上年凍西風

不吾私吹散香滿街頗有好事翁叩戶乞清供披衣揖
使入手折寧煩送譬如根株本自隣家種我生無長
物有者皆可共配花稱主人母乃被嘲弄

豆棚為風雨所壞

平生乏鮮肥肉食非所慕偶然營口腹蓄念計必誤春
種瓜豆苗愛養以孩孺插竹就茆檐縛繩使之固初看
弱蔓引漸喜衆葉布絲瓜夏蚤結落蒂甘於瓠菹豆開
獨遲白花待秋露及茲綠垂莢採摘在晨暮夜來風雨

狂傾倒莫支柱老饕自安分物理庶可悟托名得蛾眉

本草白菡豆
一名蛾眉豆吁嗟難免妬

題高錫純羽士畫像

猛虎入羣牙爪悍衆蛇齧索懸石斷平生却笑費長房
學道工夫纔及半葛陂拄杖辭壺公隨身霹靂搜蛟龍
道人有道兀不動心在一輪圓鏡中

後又題云圓月當空
先生何處撥開

雲霧請
師全露

八月十五夜與德尹桂庭對酌三首

半年門徑草芊眠
除草開塲為月圓
月正當頭花照眼
此花原是月中仙

昨日方愁雨打扉
夜來不料有清輝
可憐萬事盡如此
居者別家行者歸

時潤木獨
留邑中

看來南北東西月
只與今宵一樣圓
却對團團感離別
人生能幾十三年

東田看稻

雲氣散如濤
秋田罷桔枿
漲痕侵岸澗
稗草比禾高
米

卜豐年賤農憐瘠土勞預期營一醉歸去滌新槽

沈孟澤索題小照二首

桐陰寬罩一方苔
流水聲中洗耳來
若是補園須補竹
琴材已具少簫材

神理真傳老畫師
毫端躍躍動須眉
人間別有膏肓病

看取先生袖手時

沈精于醫

聞村家打稻聲

鵲豆籬邊捫腹行
情遊筋力負歸耕
自慚飽喫豐年飯

閒聽隣家打稻聲

九日寄諸弟湖上

如此秋光悵不同，湖天無雨又無風。
白蘋未改空洲綠，烏桕長先萬木紅。
好事誰還能送酒，浪遊吾轉悔飄蓬。
兩峯緣淺登高會，懶到今年似蟄蟲。

重陽後二日雨霽行園

兩尖家門山登陟，昨乃阻曉晴已過節。
興盡力難努我衰，萬事廢所樂在蔬圃。
早菘種旬日行列，紛可數蟲來。

蝕其苗饕餮猛于虎一寒為掃除正賴夜來兩宿根發
餘潤新葉換翠羽池西木芙蓉紅白相媚嫵下有二寸
魚花影嚼復吐何來兩鷓鴣雙翅勇自鼓公然啣魚去
飽食不避主可憐病橘林凍裂上年土坐視千緡荒官
稅私莫補天心有傾覆肯諒貧家苦物理苟不齊吾寧
守終窶

鞭筍

雨後竹走鞭鈴鴉瘦相引小僮撥土裂劔取如拾茵烹

之媚盤餐下箸吾未忍寸鞭何足惜惜者來年笋

收芋

芋肥莖葉長芋瘦莖葉短率以鹵莽報吾願良易滿年
豐百物登磊落光堆盤其魁蹲如鴟小亦伏穀卵

立冬

節候攬暮秋初陰猶未壯南檐白日影入室已一丈門
簾布差密窓紙油逾亮坐看佛前香無風烟縷上頻年
遠行役浮氣逐塵塊裘茸插兩手故與嚴威抗如今矮

屋中尚欲設屏障寧非老將至嗜好改前尚興到聊復
吟都忘往來相

落葉詩五首和趙漁玉范用賓

靜中初有聲策策起林薄俄聞響簷瓦急點疑雨作開
門日滿庭始悟風墮籜徐行踏殘葉仰見巢枝鵲鵲噪
一何喜鴉鳴一何惡客緒本無端誰禁對搖落

好景忽潛移丹黃換青綠丹黃亦隨盡假以絢吾目失
蔭無密林蔀家有豐屋嚴霜挾時令顛顛非一族何殊

百萬師委甲填坑谷

摧壞寧自主出林竟如狂
初來聚堆阜倏忽還飛揚
不妨穿我籬慎莫打我窓
籬穿可徐補窓破風滿牀

春花得人憐飄蕩尚苦遽
天公肯汝惜狼籍等敗絮
從來擇庇羣多在成蹊處
君看西家葉又過東家去

荒居環雜木最怕冬來風
如駕一芥舟震撼驚濤中
幸賴杜陵老前月已耳聾
人生有聞見榮悴方無窮

欲遊雲岫不果戲示德尹

吾鄉鷹窠頂陡起東海邊飛鳥到山止東南水浮天常
聞十月交登臨得竒觀天文直角氏日月行同躔憑高
視倒影長在寅卯間初生兆一魄摩盪蛟龍淵須臾一
綫紅迸出白玉盤晝然劈作兩對射光相穿白者忽潛
形孤輪躍紅丸是名為合璧故事山僧傳山僧老白頭
歲歲居山巔目擊凡幾箇流傳遍人寰嗟我與吾子好
竒結前緣足跡半九州所到窮山川如何名勝地近失
耳目前昨聞大阮

介卷
叔

語便思陟嶺岼朝來復逡巡相

對亦可憐勝遊無近遠人若不得間既間或少伴得伴
長無錢乃知意興豪必及少壯年一慵百事廢豈獨登
山然

題曹希文被蘭圖

噴水澆花曉尚寒試憑纖手摘來看神仙舊是瑤臺伴
再到人間合夢蘭

後落葉詩三首

衆葉四散飛
穉颺亦暫停
枯叢刺數點
有如塊粘萍
又

如將曙天尚帶三五星
烏雀聚疎影夕陽到空亭
時還墮一片夢化蘧蘧形

向榮既欣欣黃落亦槭槭
却將傍觀意為爾生分別
何如兩相忘造化本無迹
山僧撥葉至或嫌門徑窄
吾嬾不出門門前任堆積

我吟落葉詩如與落葉語
年年走關塞搖蕩愁見汝
馬頭聲蕭蕭打面風帶雨
吳霜點兩鬢歸作故林主
故林豈無春過眼同逆旅
後時感獨立孰是歲寒侶

題高江村先生泛槎圖小影次韵

葛陂龍化杖如仙，欲捲銀河瀉作泉。
除是先生能鎮定，波濤人海正粘天。

雪中呂山瀏見過

去年別君處，吳中正連陰。
雪花大如席，開船太湖心。
今年君過我，海天又寒凝。
去聲輕水觸篙破，清脆聲可聽。

一年復一年，能禁幾回老。
與君迫暮景，為別常恨早。
我有_一斗酒，可以禦北風。
酒熟挽不留，問胡太匆匆。
君言既

相見興盡我當去
尺如土番來彼此兩不遇

去冬山劉過里中余

留洞庭未返

曹希文以端硯詩四章索和即疊原韵

溪光如眼綠潭潭
洗髓何辭一再三
碧落數星瞻夜斗

水綃半尺剪春蠶
捰分琥珀知難並
匣配琉璃定不慙

三十六鱗煩寄取
好磨濃墨寫雲藍

用段柯古詩中事

紫雲一角割天南
秀色猶看帶嶺嵐
東峽波濤時一湧

濕毫風雨潤長含
來疑覽杜光吞月
去恐延津勢躍鐔

神物自來須善保有求容易遂虞曇

時有欲得宋齋執法硯者故及之

巖洞烟霞笑未憚欲隨翡翠竟巢南
筆因興到詩情淡嗜與年深石性諳
圭璧方圓形總肖龍蛇蟠攫力誰堪
兩都賓主如相見淬瑩才鋒出健談

雅好雖多不厭貪眼中似爾亦竒憨
一生自許癡無偶

兩手徒誇硯必三

古人以貪多者為兩手三硯希文蓄石最富故云

俗論掃空

和氏癖辨香爭識米家菴新宮銘草誰先就
仙掌摩挲

與細探

食薺

朝來食指無端動走覓隣園又一竒
薄雪乍消青冒土
滿藍香薺未花時

冬夜宿古衡山先奉政公祠下感賦

路滑水堅賴短筇到來支枕榻纔容透窓燭影寒於月
拏雪松枝健比龍老屋將傾傷世澤墓田久廢媿春農
十年塵夢憑呼覺金粟山頭一杵鐘

除夕示德尹潤木信菴四首

前夜雷霆了不驚

三日前
大雷電

靜中擾擾惜羣生一村野犬

多狂走多事隣家爆竹聲

山妻椎髻子頭蓬布褐隨宜稱老翁特與孫雛破年例
抱來膝上換青紅

從前筆墨粗償債削藁存來得幾何剛是今年無可汰
應酬詩少唱酬多

村巷無雞漏板遲漫漫長夜夜何其野人預辦朝眠熟

怕作新年日蝕詩

明年元
旦日食

敬業堂詩集卷十三